



## Praefatio.

*Divendita pharmacopoea Danica, quae abhinc viginti fere annos prodit, Collegio sanitatis regio placuit, novam pharmacopoeam edi, quae disciplinae progressibus magis quam prior responderet; quam ob rem a ministro, cui summa rei iudiciariae cura data est, collegium petivit, ut nobis, quorum nomina huic praefationi subscripta sunt, munus novae pharmacopoeae conscribendae mandaretur.*

*In hac pharmacopoea exaranda duae res respiciendae erant, quarum in prioribus pharmacopoeis nulla erat ratio habita. Quum enim inter rectores civitatum septentrionalium Daniae, Sveciae, Norvegiae convenisset, ut in novis pharmacopoeis horum regnorum conficiendis id agendum esset, ut summa earum esset conspiratio et consensus, prospiciendum erat, ut omnia praeparata fortiora, quorum quidem nomina eadem essent, in tribus pharmacopoeis eodem modo componerentur, et vis eorum eadem esset. Quae ea de causa in vi et efficientia graviorum remediorum compositorum necessario mutanda erant, in notis singulis remediis subjectis indicavimus. Quum vero novae pharmacopoeae Sveciae et Norvegiae nondum editae sint, nomina, quibus remedia in pharmacopoea Svecica et Norvegica nunc usitata designantur, addidimus, si remedia in iis inveniuntur.*

*Tum vero observanda erat lex, a. d. 16 Kal. Mart. a. 1868 a rege sancita; ex hac lege, quae Collegii sanitatis regii hortatu lata est, Gallicum pondus grammatum medicis in remediis praescribendis et pharmacopolis in remediis ad usum medicum dispensandis dehinc erit adhibendum. Qua ratione inita, pondus medicinale apud nos usitatum respondebit*

*ponderi ab omnibus fere populis, quorum vita artibus exulta est, recepto; quae res quanto usui sit futura, omnibus perspicuum esse debet; atque in Svecia et Norvegia idem pondus in posterum recipietur.*

*Ut mutatio ponderis prioris in novum facilius esset, tabulam addidimus, quae indicat, quomodo pondus recentius vetustiori accurate respondeat, ponderibus singulis inter se comparatis. Sed quoniam difficultates vix superabiles oriri poterunt, si quantitas singulorum remediorum in formula medica vetustiore praescriptorum accurate erit dispensanda, atque exigua differentia vim remedii nihil admodum mutabit, tabulam confecimus, in qua computatio ponderum priorum ex nova ponderis ratione quam accuratissime facta est; quae tabula ut auctoritate publica confirmetur, a ministro petemus. Propter hanc ponderis mutationem necesse fuit in remediis nonnullis compositis conficiendis relationem singularum partium aliqua ex parte immutare; itemque in Decoctis et Infusis parandis relatio substantiae et colaturae mutanda erat.*

*Ne quid a pharmacopolis per errorem delinqueretur, duos indices venenorum et remediorum fortium vel heroicorum, quae vocantur, addidimus; vasa, in quibus haec remedia a pharmacopolis conduntur, et scrinia, in quibus venena asservantur, hoc signo † † † notanda erunt, ut remedia illa ea, qua par sit, cautione serventur.*

*Denique hoc quoque observandum est, certa quaedam remedia in hanc pharmacopoeam non esse recepta, quum alia eorum aut omnibus tam nota sint aut tam levi momento, ut accuratior eorum descriptio supervacanea videatur, alia non sint medicamenta sed in medicamentis nonnullis parandis adhibeantur, cujus generis sunt lac, vinum, fructus recentes, gossypium, carbones lignei, chloratum calcicum, alia.*

M. Djørup.      T. S. Warncke.      A. Piper.  
S. M. Trier.